



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH», broj: 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH», broj: 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08 i 5/22), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2020. GODINU **PLATFORME ZA PROGRES**

Broj: 03-07-6-907/21  
Sarajevo, 16.01.2023. godine

## S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA .....	4
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	6
5.1.NALAZI.....	6
5.2. PREPORUKE .....	15

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Platforme za progres za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2020. godinu, utvrđeno je da je Platforma za progres prekršila odredbe člana 4. stav (1), člana 5. stav (4), člana 6. stav (4) i stav (5), člana 8. stav (1) i stav (4), člana 11. stav (1) i člana 12. stav (1), stav (3) i stav (4) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka izvršila je pregled godišnjeg finansijskog izvještaja Platforme za progres za 2020. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Platforma za progres se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	27.118,29	8,44
2.	Prilozi fizičkih lica ( 3-a )	226.757,40	70,55
3.	Prilozi pravnih lica ( 3-b )	25.674,54	7,99
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	40.965,81	12,75
7.	Prihodi iz budžeta ( 3-f )	897,20	0,28
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>321.413,24</b>	<b>100,00</b>
<b>II</b>	<b>Ostali prihodi i drugo</b>	<b>0,14</b>	<b>0,00</b>
<b>Izvori finansiranja (I+II)</b>		<b>321.413,38</b>	<b>100,00</b>

U godišnjem finansijskom izvještaju za 2020. godinu Platforma za progres iskazala je rashode u iznosu od 356.846,91 KM.

## 2. PREDSTAVLJANJE POLITIČKE STRANKE

Naziv političke stranke: Platforma za progres. Skraćeni naziv: Platforma.

Politička stranka Mirsad Hadžikadić-Platforma za progres registrovana je kod Općinskog suda u Sarajevu dana 20.04.2018. godine, Rješenjem broj: 065-0-F1-18-000005. Dana 15.11.2018. godine, Rješenjem Općinskog suda u Sarajevu broj: 065-0-F1-18-000012 upisana je promjena naziva političke stranke, koji glasi: Platforma za progres. Rješenjem broj: 065-0-F1-20-000005 od 30.04.2020. godine upisana je promjena sjedišta stranke.

Sjedište političke stranke je u Sarajevu, ulica Hiseta 1.

Lice ovlašteno za zastupanje stranke je Mirsad Hadžikadić, predsjednik.

Lice ovlašteno za finansijske izvještaje za 2020. godinu je Sanel Šarić.

Prema podacima iz godišnjeg finansijskog izvještaja za 2020. godinu, politička stranka ima sljedeću organizacionu strukturu:

- Centrala.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Platforme za progres za 2020. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih 2020. godine.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Platforme za progres obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim osvrtom na priloge fizičkih lica i prihode iz budžeta.

### 4. PRETHODNE KONTROLE I REVIZIJE

Služba za reviziju je izvršila pregled, kontrolu i reviziju finansijskih izvještaja Platforme za progres za 2018. i 2019. godinu, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon obavljene revizije finansijskih izvještaja za 2019. godinu, izdat je Izvještaj o reviziji sa mišljenjem revizora, nalazima i preporukama stranci da sačini i dostavi program utroška sredstava i da finansijska sredstva obezbijedena za finansiranje stranke koristi u skladu sa programom utroška sredstava, da prijavljuje sve priloge i da izdaje potvrde o prijemu priloga, da se ne finansira iz zabranjenih izvora, da vodi poslovne knjige u skladu sa računovodstvenim propisima, odnosno da vodi potpune, pravovremene i pravilne evidencije o novčanim tokovima, prihodima, rashodima i obavezama, kao pretpostavku za pravilno finansijsko izvještavanje i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka. Takođe je preporučeno da uspostavi upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge, da se poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma, da izvrši usaglašavanje obaveza sa dobavljačima i provede odgovarajuća knjiženja u poslovnim knjigama, da vrši redovan popis imovine i obaveza u skladu sa računovodstvenim propisima, da sadržaj potvrde o primljenoj članarini i priložima od fizičkih i pravnih lica uskladi sa odredbama člana 6. Pravilnika o godišnjim finansijskim izvještajima političkih stranaka, da definiše postupke i procedure internih kontrola u vezi sa procesom trošenja finansijskih sredstava stranke i da poštuje i druge propise, prevashodno finansijske propise o poslovanju gotovim novcem.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2020. godinu, utvrđeno je da Platforma za progres nije ispoštovala date preporuke.

## 5. NALAZI I PREPORUKE

### 5.1. NALAZI

**a) Platforma za progres prekršila je odredbe člana 4. stav (1) Zakona o finansiranju političkih stranaka<sup>1</sup>.**

U godišnjem finansijskom izvještaju za 2020. godinu Platforma za progres iskazala je ukupne rashode u iznosu od 356.846,91 KM.

Uvidom u Program utroška sredstava za 2020. godinu utvrđeno je da je stranka planirala rashode u ukupnom iznosu od 248.850,00 KM.

Pregledom finansijskog izvještaja i finansijske dokumentacije, utvrđeno je da je politička stranka sredstva utrošila mimo svog programa utroška sredstava za 2020. godinu, kako slijedi:

- U Programu utroška sredstava nisu planirani troškovi platnog prometa, negativne kursne razlike, takse, novčane kazne i sl., troškovi održavanje opreme i troškovi poreza i dr. obaveza. U godišnjem finansijskom izvještaju stranka je navedene troškove iskazala u ukupnom iznosu od 15.295,25 KM, i to: troškove platnog prometa u iznosu od 2.561,55 KM, negativne kursne razlike u iznosu od 2.207,43 KM, takse, novčane kazne i sl. u iznosu od 7.100,00 KM, troškove održavanja opreme u 2.542,86 KM i troškove poreza i dr. obaveza u iznosu od 883,41 KM.

- Stranka je planirane troškove ugovora o djelu prekoračila za 23.612,28 KM, troškove hotelskih usluga za 1.594,50 KM, troškove kancelarijskog materijala za 1.273,25 KM, troškove grijanja za 289,45 KM, troškove sitnog inventara i auto guma za 11.516,91 KM, troškove zakupnine poslovnih prostorija za 30.450,00 KM, troškove komunalnih usluga (odvoz smeća) za 190,41 KM, te troškove knjigovodstvenih usluga za 63,00 KM.

- Stranka je planirane troškove izborne kampanje prekoračila za 92.970,30 KM. U godišnjem finansijskom izvještaju stranka je iskazala troškove izborne kampanje u ukupnom iznosu od 114.570,30 KM, dok je u Programu utroška sredstava za 2020. godinu planirala ove troškove u ukupnom iznosu od 21.600,00 KM.

S obzirom da je stranka finansijska sredstva u iznosu od 177.255,35 KM utrošila mimo utvrđenog Programa utroška finansijskih sredstava za 2020. godinu, prekršene su odredbe člana 4. stav (1) Zakona o finansiranju političkih stranaka.

**b) Platforma za progres prekršila je odredbe člana 5. stav (4) i člana 6. stav (4) i stav (5) Zakona o finansiranju političkih stranaka.**

(1) Kontrolom podataka o uplatama putem PayPal računa, utvrđeno je da stranka u poslovnim knjigama nije evidentirala, a u godišnjem finansijskom izvještaju nije prijavila donacije uplaćene putem PayPal računa u decembru 2020. godine u ukupnom iznosu od 7.601,14 KM, čime je prekršila odredbe člana 5. stav (4) Zakona o finansiranju političkih stranaka.

Isto tako, utvrđeno je da stranka nije uspostavila pravilne evidencije o priložima fizičkih i pravnih lica koji su uplaćeni putem PayPal računa, jer je iste umanjivala za iznos provizije koja je naplaćena za svaku transakciju pojedinačno.

(2) Platforma za progres nije u godišnjem finansijskom izvještaju prijavila nenovčanu donaciju pravnog lica „Europlakat BH“ d.o.o. Sarajevo po osnovu zakupa 50 površina za billboard i 50 površina za city light po povoljnijim uslovima, čime je prekršila odredbe člana 5. stav (4) Zakona o finansiranju političkih stranaka.

---

<sup>1</sup> U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

Dobavljač „Europlakat BH“ d.o.o. Sarajevo je za zakup 100 površina (billboard i citylight) u periodu od 28.10.2020. od 14.11.2020. godine izdao fakturu br. 863-10/20 od 28.10.2020. godine u iznosu od 1.755,00 KM. Uvidom u fakturu utvrđeno je da pojedinačne cijene značajno odstupaju od ponuđenih cijena zakupa, te da je dobavljač stranci odobrio rabat od 97,57 % na cijenu billboard, te 97,28% na cijenu city light, odnosno 58.028,57 KM.

Na osnovu navedenog, utvrđeno je da je stranka ostvarila prilog pravnog lica „Europlakat BH“ d.o.o. Sarajevo u iznosu od 58.028,57 KM, koji je za 8.028,57 KM veći u odnosu na dozvoljeni limit na visinu priloga, čime su prekršene odredbe člana 6. stav (4) Zakona o finansiranju političkih stranaka<sup>2</sup>.

- (3) Platforma za progres je u obrascima 3-a (prilozi fizičkih lica) i 3-e (nenovčane donacije i računi koje politička stranka nije imala obavezu da plati) godišnjeg finansijskog izvještaja iskazala da je fizičko lice Sakiba Hotović dala novčanu donaciju stranci u iznosu od 9.716,56 KM i nenovčane donacije u vrijednosti od 4.500,00 KM.

Kontrolom pojedinačnih uplata na račune stranke, te uvidom u dodatnu dokumentaciju, utvrđeno je da je fizičko lice Sakiba Hotović dala novčane priloge stranci u ukupnom iznosu od 7.870,85 KM, nenovčanu donaciju po osnovu otpisanih potraživanja u iznosu od 1.932,20 KM i nenovčanu donaciju po osnovu besplatnog korištenja poslovnog prostora u periodu od 15.04. do 31.12.2020. godine u ukupnom iznosu od 8.500,00 KM, odnosno ukupno 18.303,05 KM.

S obzirom da je primila donacije fizičkog lica u većem iznosu za 3.303,05 KM u odnosu na zakonom dozvoljeni limit na visinu priloga, politička stranka je prekršila odredbe člana 6. stav (5) Zakona o finansiranju političkih stranaka.

Platforma za progres prekršila je i odredbe člana 5. stav (4) Zakona o finansiranju političkih stranaka jer u finansijskom izvještaju nije prijavila nenovčanu donaciju fizičkog lica Sakiba Hotović po osnovu besplatnog korištenja poslovnog prostora u periodu od 01.09. do 31.12.2020. godine u ukupnom iznosu od 4.000,00 KM.

Naime, uvidom u Aneks ugovora o zakupu poslovnog prostora, br. 07,3-10/20 od 10.04.2020. godine, utvrđeno je da je mjesečna zakupnina iznosila 1.000,00 KM, te da stranka nema obavezu da plaća zakupninu za poslovne prostorije u periodu od 15.04.2020. godine do 31.12.2020. godine. Stranka je u poslovnim knjigama evidentirala obavezu prema ovom fizičkom licu za korištenje poslovnog prostora u periodu od 01.09. do 31.12.2020. godine u ukupnom iznosu od 4.000,00 KM, odnosno nije oprihodovala ovaj iznos, čime je izbjegla da iskaže ostvareni prihod.

**c) Platforma za progres prekršila je odredbe člana 8. stav (1) i stav (4) Zakona o finansiranju političkih stranaka.**

- (1) Platforma za progres je tokom 2020. godine putem PayPal računa primila uplate od pravnih lica iz inostranstva i uplate za koje nema dovoljno podataka o identitetu donatora, čime je prekršila odredbe člana 8. stav (1) tačka i) i tačka e) Zakona o finansiranju političkih stranaka<sup>3</sup>.

Uvidom u podatke sa pregleda prometa ostvarenog putem PayPal računa u periodu od 01.01. do 31.12.2020. godine utvrđeno je da je stranka primila sredstva od sljedećih donatora: ITCV Global FX u iznosu od 50,15 KM, IBM-Idaho Building Maintenance, LLC u iznosu od 82,54 KM, Pomoć za izgradnju kuće za porodice Okić i Kajtezović u iznosu od 176,97 KM, Nihad Inc u iznosu od 346,32 KM, Übersetzungsburo Kadunic u iznosu od 39,12 KM, Creating New You u iznosu od 34,82 KM, Dating u iznosu od 39,12 KM, Deal depot u iznosu od 176,42 KM, English tutor u iznosu od 20,89 KM, Freser u iznosu od 39,12 KM, Happyhours.ba u iznosu od 39,12 KM, My

<sup>2</sup> Odredbom člana 6. stav (4) Zakona o finansiranju političkih stranaka propisano je da ukupan iznos priloga pravnog lica političkoj stranci u jednoj kalendarskoj godini ne može prelaziti 50.000,00 KM.

<sup>3</sup> Članom 8. stav (1) tačka i) i tačka e) Zakona o finansiranju političkih stranaka zabranjeno je finansiranje političkih stranaka od strane pravnih lica iz inostranstva i neimenovanih, odnosno anonimnih donatora.

CPA Services u iznosu od 19,56 KM i Sponiart u iznosu od 38,62 KM, odnosno ukupno 1.102,77 KM.

- (2) Na osnovu obavljenog pregleda finansijskih izvještaja utvrđeno je da je Platforma za progres primila priloge pravnog lica „Akva invest” d.o.o. Živinice koje je u toku 2020. godine imalo sklopljene ugovore o javnim nabavkama radova i usluga sa organom izvršne vlasti čija je vrijednost veća od 10.000,00 KM, što je suprotno odredbama člana 8. stav (4) Zakona o finansiranju političkih stranaka.

Platforma za progres je u toku 2020. godine primila priloge pravnog lica „Akva invest” d.o.o. Živinice u ukupnom iznosu od 1.000,00 KM. Prema podacima koje je dostavio Grad Živinice, pravno lice „Akva invest” d.o.o. Živinice je sa Gradom Živinice u toku 2020. godine imalo zaključen Ugovor o obavljanju poslova u iznosu od 39.971,18 KM, te Okvirni sporazum/Ugovor o nabavci radova u iznosu od 24.722,10 KM.

**d) Platforma za progres prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Na osnovu obavljenog pregleda godišnjeg finansijskog izvještaja i dodatne dokumentacije, utvrđeno je da Platforma za progres nije uspostavila pravilne, potpune i pravovremene evidencije o svojim prihodima, rashodima i obavezama, godišnji finansijski izvještaj za 2020. godinu nije dostavila u zakonom propisanom roku i obrasce godišnjeg finansijskog izvještaja za 2020. godinu nije popunila u skladu sa Pravilnikom o godišnjim finansijskim izvještajima političkih stranaka („Službeni glasnik“ br. 96/13 i 89/16)-u daljem tekstu: Pravilnik, čime je prekršila računovodstvene propise i odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Platforma za progres je godišnji finansijski izvještaj za 2020. godinu putem aplikacije FI CIK BiH dostavila dana 30.04.2021. godine, dok je odštampane obrasce finansijskog izvještaja u čvrstoj kopiji dostavila dana 06.05.2021. godine.

Rok za dostavljanje godišnjeg finansijskog izvještaja za 2020. godinu bio je 31.03.2021. godine.

- (2) Platforma za progres je u obrascu 1-1 (organizaciona struktura političke stranke) godišnjeg finansijskog izvještaja navela da ima samo organizacioni dio Centrala stranke.

Uvidom u ugovore o zakupu poslovnih prostorija i podatke iz poslovnih knjiga za 2020. godinu, utvrđeno je da je, osim prostorija koje je koristila Centrala, Platforma za progres koristila i prostorije u sljedećim općinama i gradovima: Vogošća, Ilidža, Novi Grad Sarajevo, Bihać, Tuzla, Gradačac, Jablanica, Visoko, Zavidovići, Sanski Most i Cazin.

S obzirom da u godišnjem finansijskom izvještaju nije iskazala cjelokupnu organizacionu strukturu, tj. nije iskazala niže organizacione odbore, stranka je prekršila odredbe člana 10. Pravilnika.

- (3) Platforma za progres nije pravilno iskazala podatke o prihodima iz budžeta, čime je prekršila odredbe člana 19. Pravilnika.

Stranka je u obrascu 3-f (prihodi iz budžeta) iskazala prihode iz budžeta Općine Centar Sarajevo u iznosu od 897,20 KM. Uvidom u izvode sa transakcijskog računa utvrđeno je da je stranka primila sredstva iz budžeta Općine Stari Grad Sarajevo u iznosu od 897,20 KM, te da nije ostvarila prihode iz budžeta Općine Centar Sarajevo.

- (4) U obrascu 3 (izvori finansiranja) i 3-e (nenovčane donacije i računi koje stranka nije imala obavezu platiti) godišnjeg finansijskog izvještaja stranka nije iskazala nenovčanu donaciju pravnog lica „Europlakat BH“ d.o.o. Sarajevo, čime je prekršila odredbe člana 13. i 18. Pravilnika.



Takođe je utvrđeno je da stranka troškove iznajmljivanja površina za billboard i city light po računu „Europlakat BH“ d.o.o. Sarajevo iskazala u manjem iznosu u odnosu na stvarne, što je suprotno odredbama člana 21. i 23. Pravilnika. Nastale troškove stranka je imala obavezu prijaviti u obrascu 4.2 finansijskih izvještaja.

- (5) Pregledom finansijskog izvještaja i dodatne dokumentacije, utvrđeno je da stranka u poslovnim knjigama i finansijskom izvještaju nije evidentirala sve priloge fizičkih i pravnih lica i nije pravilno iskazala podatke o donatorima i iznosima priloga, čime je prekršila odredbe člana 13., 14. i 15. Pravilnika. Isto tako, utvrđeno je da je stranka na istom kontu u poslovnim knjigama evidentirala priloge i fizičkih i pravnih lica, te nenovčane donacije, odnosno nije uspostavila pravilne evidencije o priložima, kao pretpostavku za pravilno finansijsko izvještavanje.

Služba za reviziju je utvrdila i da je stranka uplatu sredstava na PayPal račun iz decembra 2019. godine u poslovnim knjigama iskazala kao prihode 2020. godine, te iskazala u godišnjem finansijskom izvještaju za 2020. godinu, što ukazuje da ne vodi pravilne i pravovremene evidencije o svojim prihodima, odnosno da podaci o priložima koji su iskazani u obrascima godišnjeg finansijskog izvještaja za 2020. godinu ne odgovaraju iznosu ostvarenih prihoda u 2020. godini.

Pored navedenog, a nakon izvršenog uvida u dostavljene potvrde o primljenim donacijama izdate fizičkim i pravnim licima, utvrđeno je da na istim nisu navedeni podaci o broju identifikacionog dokumenta/identifikacioni broj donatora, kao i da podaci o broju potvrde navedeni u obrascu 3-a ne odgovaraju brojevima na izdatim potvrdama, što je suprotno odredbama iz člana 6. Pravilnika.

- Kontrolom podataka o uplatama putem PayPal računa, utvrđeno je da stranka u poslovnim knjigama nije evidentirala, a u godišnjem finansijskom izvještaju nije prijavila prihode po osnovu članarina i donacija uplaćenih putem PayPal računa u decembru 2020. godine u ukupnom iznosu od 7.601,14 KM<sup>4</sup>. S druge strane, stranka je prihode po osnovu članarina i donacija koje su uplaćene putem PayPal računa u decembru 2019. godine u ukupnom iznosu od 11.327,95 KM<sup>5</sup> iskazala u poslovnim knjigama i godišnjem finansijskom izvještaju za 2020. godinu kao prihode iz 2020. godine.

Pored navedenog, utvrđeno je da je stranka prihode naplaćene putem PayPal računa (uplate fizičkih i pravnih lica) u periodu od januara do novembra 2020. godine iskazala u manjem iznosu za 3.502,71 KM<sup>6</sup> u odnosu na ostvarene, jer je primljene uplate na PayPal račun umanjivala za iznos provizije koja je naplaćena za svaku transakciju pojedinačno.

Potrebno je napomenuti da je stranka prihode priznavala tek u momentu prenosa sredstava sa PayPal računa na devizne račune, i to umanjene za iznos provizije, a ne u mometu kada su sredstva naplaćena.

- Pregledom obrazaca godišnjeg finansijskog izvještaja, izvoda i podataka sa transakcijskih i deviznih računa, PayPal računa i blagajne stranke, utvrđeno je sljedeće:
  1. Stranka je u obrascu 3-a (prilozi fizičkih lica) navela da je dana 12.11.2020. godine primila priloge fizičkog lica Alen Sarajčić u iznosu od 100,00 KM, te prilog fizičkog lica Alen Saraji u iznosu od 100,00 KM dana 26.05.2020. godine. Uvidom u izvode sa transakcijskog računa broj: 1994990011790463 utvrđeno je da je na izvodu od 12.11.2020. godine navedeno samo: Alen Saraji, što odgovara podatku iskazanom u obrascu 3-a, međutim, ostali podaci: ime oca, broj transakcijskog računa uplatioca donacija i opis (iskra 7056) su identični za obje uplate. Navedeno ukazuje da je isto lice izvršilo uplatu donacije, te da stranka ne vodi pravilne evidencije o priložima.

<sup>4</sup> Uplaćeno je 3.399,91 USD i 980,00 EUR.

<sup>5</sup> Preneseno sa PayPal računa stranka na devizni račun stranke kod Sparkasse bank 02.01.2020. godine.

<sup>6</sup> 1.311,91 USD; 546,00 EUR; 107,57 SEK; 60,10 NOK; 70,58 CHF; 22,72 AUD; i 124,20 DKK.

Kontrolom izvoda sa istog transakcijskog računa utvrđeno je da je fizičko lice Filzeta Kadrić, dana 24.09.2020. godine, izvršila uplatu sredstava po osnovu članarina i priloga prikupljenih od više lica u iznosima od 615,00 KM, 240,00 KM i 150,00 KM.

U opisu uplate u iznosu od 615,00 KM navedeno je da se sredstva u iznosu od 60,00 KM odnose na donaciju Erdina Kadunića, Maide Smriko u iznosu od 40,00 KM i Samira Vojnikovića u iznosu od 100,00 KM, odnosno ukupno 200,00 KM. Iz izvoda je očito da je još jedno lice, za koje je navedeno samo Elvis, donator stranke, ali ostali podaci o donatoru nisu navedeni na izvodu. Stranka je u obrascu 3-a navela da je donacija fizičkog lica Filzeta Kadrić na dan 24.09.2020. godine iznosila 415,00 KM.

Kada je riječ o uplati od 240,00 KM, utvrđeno je da je na izvodu navedeno da se iznos od 40,00 KM odnosi na članarinu Mehmeda Kadirića, dok je 100,00 KM donacija Filzete Kadrić, dok za razliku u iznosu od 100,00 KM nema podataka.

2. Kontrolom izvoda sa deviznih računa utvrđeno je da je fizičko lice Senad Mujić uplatio sredstva u iznosu od 181,19 KM (u CHF), od čega je stranka u poslovnim knjigama 20,00 KM evidentirala kao članarinu, a 161,19 KM je proknjiženo na kontu donacija. Stranka u obrascu 3-a nije iskazala prilog ovog lica u dijelu obrasca u koji se upisuju prilozi veći od 100,00 KM.
3. Politička stranka je u obrascu 3-a iskazala priloge fizičkog lica Nihad Inc u iznosima od 174,25 KM i 165,08 KM. Uvidom u dokumentaciju o uplatama na Paypal račun, utvrđeno je da je Nihad Inc uplatio donacije stranci, međutim, stranka je na potvrdama o primljenim priložima navela da je fizičko lice Nihad Latić dao priloge stranci u iznosu od 165,08 KM i 174,25 KM.
4. Platforma za progres je u obrascu 3-a iskazala priloge Husejina Kuduzovića u ukupnom iznosu od 264,04 KM.  
Kontrolom izvoda sa deviznih računa i blagajničkog izvještaja broj: 22/20 od 26.02.2020. godine, utvrđeno je da je fizičko lice Husejin Kuduzović na devizni račun uplatio sredstva u iznosu od 130,06 KM, od čega je stranka u poslovnim knjigama 20,00 KM evidentirala kao članarinu, a 110,06 KM je proknjiženo na kontu donacija. Isto fizičko lice je putem blagajne stranke uplatilo donaciju u 174,00 KM. Stranka je u poslovnim knjigama evidentirala prilog u iznosu od 154,00 KM, koji je iskazala u obrascu 3-a, dok je 20,00 KM evidentirala kao prihode od članarine i u finansijskom iskazala kao članarine.  
Na osnovu navedenog, utvrđeno je da su prilozi fizičkog lica Husejina Kuduzovića iznosili ukupno 284,04 KM, a članarina 20,00 KM.
5. Politička stranka je u obrascu 3-a godišnjeg finansijskog izvještaja iskazala priloge fizičkog lica Lejla Kulović u ukupnom iznosu od 2.416,20 KM. Uvidom u izvode sa transakcijskog računa broj: 1994990011790463 utvrđeno je da je Lejla Kulović dana 08.01.2020. godine uplatila donacije po spisku u iznosima od 1.016,20 KM i 320,00 KM. Stranka je za primljene donacije izdala potvrde br. N1212 i N1213 i navela da je donator Lejla Kulović, iako je iz samog izvoda evidentno da je izvršen polog prikupljenih donacija.
6. Platforma za progres je u obrascu 3-a godišnjeg finansijskog izvještaja iskazala prilog fizičkog lica Aida Zaklan u iznosu od 1.575,97 KM. Uvidom u izvode sa PayPal računa utvrđeno je da je ovo fizičko lice stranci doniralo sredstva u iznosu od 2.138,35 KM (8.150,00 DKK). Takođe, stranka je u obrascu 3-a iskazala donaciju fizičkog lica Amra Kanlić u iznosu od 829,79 KM, dok je uvidom u izvode sa PayPal računa utvrđeno da je ovo fizičko lice uplatilo sredstva u iznosu od 918,78 KM. Stranka je primila donacije Mirzete Hadžikadić u ukupnom iznosu od 1.204,94 KM, dok je u godišnjem finansijskom izvještaju iskazala prilog u ukupnom iznosu od 1.012,35 KM.

Isto tako, utvrđeno je da, između ostalih, nisu iskazani tačni podaci o priložima fizičkih lica Amer Tvrtak, Anto Jazvić, Armin Čabrić, Dževad Šestan, Redžep Mešanović, Sejda Čavčić, Selver Bašić, Ševal Memić i Amer Šestan.

7. U obrascu 3-a godišnjeg finansijskog izvještaja Platforma za progres je iskazala priloge fizičkog lica Sakiba Hotović u iznosima od 1.932,36 KM i 7.784,20 KM, odnosno ukupno 9.716,56 KM.

Kontrolom uplata na devizni i PayPal račun, utvrđeno je da je ovo fizičko lice na devizni račun dana 13.05.2020. godine uplatilo 7.784,20 KM, dok je na PayPal računu u julu 2020. godine uplaćeno 50,00 USD, odnosno 86,65 KM.

Uvidom u poslovne knjige utvrđeno je da je u korist prihoda izvršen otpis potraživanja po osnovu pozajmice primljene od fizičkog lica Sakiba Hotović u iznosu od 1.932,36 KM, što je evidentirano na kontu 412000-*Prihodi od donacija*.

S obzirom da je riječ o otpisu potraživanja, stranka je u skladu sa članom 18. Pravilnika, nenovčanu donaciju ovog fizičkog lica u iznosu od 1.932,36 KM trebala iskazati u obrascu 3-e godišnjeg finansijskog izvještaja.

Pored navedenog, a što je konstatovano i u nalazu pod b), utvrđeno je da je stranka nenovčanu donaciju fizičkog lica Sakiba Hotović po osnovu besplatnog korištenja poslovnog prostora u poslovnim knjigama i godišnjem finansijskom izvještaju iskazala u manjem iznosu za 4.000,00 KM u odnosu na ostvarenu.

8. Kontrolom iskazanih priloga fizičkih lica utvrđeno je da je stranka u poslovnim knjigama i godišnjem finansijskom izvještaju iskazala priloge fizičkog lica Amer Čatović u iznosu od 3.332,40 KM.

Uvidom u izvode sa Paypal računa utvrđeno je da je fizičko lice Amer Čatović u toku 2020. godine političkoj stranci donirao sredstva u ukupnom iznosu od 1.500,00 USD, odnosno 2.514,50 KM. Prema podacima iz izvoda, ovo fizičko lice je stranci uplatilo sredstva u oktobru 2020. godine u iznosu od 1.678,53 KM, te u decembru 835,97 KM. Stranka je, međutim, u poslovnim knjigama i obrascu 3-a godišnjeg finansijskog izvještaja iskazala priloge fizičkog lica Amer Čatović uplaćene u decembru 2019. godine u iznosu od 1.643,87 KM i oktobru 2020. godine u iznosu od 1.678,53 KM, dok nije evidentirala uplatu iz decembra 2020. godine u iznosu od 835,97 KM.

9. Stranka je putem PayPal računa primila donacije fizičkog lica Medžida Mulić u ukupnom iznosu od 136,91 KM, koje je i evidentirala u poslovnim knjigama. Stranka je, međutim, u obrascu 3-a priloge ovog fizičkog lica pogrešno iskazala kao priloge niže od 100,00 KM. Stranka u obrascu 3-a u dijelu gdje se unose podaci o priložima većim od 100,00 KM nije iskazala ni priloge Anela Cokoje u ukupnom iznosu od 293,37 KM. Isto tako, nisu iskazani ni prilozi fizičkih lica Drago Dordić, Izudin Džafić i Dženana Mandžukić.
10. Uvidom u izvode sa transakcijskog računa i blagajnički izvještaj br. 24/20 od 05.03.2020. godine, utvrđeno je da su na transakcijski račun stranke uplaćena sredstva, koja su prikupljena putem blagajne, u iznosu od 2.050,00 KM, a prema spisku na kojem je navedeno pet fizičkih lica. Uvidom u poslovne knjige utvrđeno je da je od svake pojedinačne uplate, izdvajano 20,00 KM kao prihod od članarine, dok je razlika evidentirana kao prilog fizičkih lica.  
Uvidom u spisak utvrđeno je da na spisku nije predviđeno mjesto za potpis donatora, te da nije jasno naznačen datum prijema donacija.

Takođe, kontrolom izvoda sa transakcijskog računa i dnevnika blagajne broj: 22/20 od 26.02.2020. godine, utvrđeno je da je šest fizičkih lica uplatilo sredstva u blagajnu u ukupnom iznosu od 728,00 KM, te da su istog dana na transakcijski račun stranke uplaćena sredstva, koja su prikupljena putem blagajne, u iznosu od 2.062,00 KM.

Uvidom u spisak koji je stranka dostavila, utvrđeno je da su donacije u iznosu od 2.062,00 KM uplatila 32 fizička lica, te da na spisku nije predviđeno mjesto za potpis donatora i da nije jasno naznačen datum prijema donacija, što ukazuje da stranka ne vodi pravilne evidencije o prijemu donacija i članarina, odnosno pomoćnu knjigu blagajne. Ističemo da je stranka od pojedinačnih uplata sredstva u iznosu od 20,00 KM evidentirala kao članarine, a razliku kao priloge fizičkih lica.

11. Uvidom u pojedinačne potvrde o primljenim priložima od fizičkog lica Nejira Sarajalić, utvrđeno je da je stranka u obrascu 3-a iskazala pogrešan broj potvrde za priloge u iznosima od 470,00 KM i 305,00 KM.

Na osnovu svega navedenog, konstatujemo da stranka prilikom popunjavanja podataka o donatorima i iznosima pojedinačnih priloga u obrascima godišnjeg finansijskog izvještaja nije postupala u skladu sa odredbama člana 14. Pravilnika, tj. podatke o priložima fizičkih lica, kao što su: ime i prezime i iznos priloga, nije pravilno iskazala u obrascu 3-a.

Ističemo da politička stranka u obrascu 3-a (prilozi fizičkih lica) ima obavezu da iskaže podatke o svakom donatoru pojedinačno, ukoliko je ukupan iznos svih novčanih priloga istog lica veći od 100,00 KM. Stranka je obavezna da navede podatke iz kojih se jasno može utvrditi identitet donatora, ime i prezime, broj potvrde o primljenom prilogu, datum kada je prilog primljen i iznos priloga. Ukoliko isti donator u toku jedne kalendarske godine političkoj stranci da više puta priloge u iznosima manjim od 100,00 KM, stranka je obavezna sabrati sve te priloge, i ukoliko je njihov ukupan iznos veći od 100,00 KM u obrascu navesti podatke o donatoru i ukupan iznos priloga. Prilozi čiji je iznos u toku jedne kalendarske godine manji od 100,00 KM u izvještaju se iskazuju zbirno, u dijelu obrasca 3-a Prilozi niži od 100,00 KM.

- (6) Platforma za progres nije uspostavila potpune i pravilne evidencije o rashodima i nije pravilno iskazala rashode u obrascima godišnjeg finansijskog izvještaja, čime je prekršila odredbe člana 7. stav (2), 21, 22. i 23. Pravilnika.

- Stranka u poslovnim knjigama nije uspostavila evidencije o troškovima po svojim organizacionim dijelovima niti je u godišnjem finansijskom izvještaju iskazala podatke o troškovima u obrascima 4.1 (režijsko-administrativni i ostali troškovi) za svaki organizacioni dio posebno, a što je bila obavezna u skladu sa odredbama člana 7. stav (2) Pravilnika.
- Kontrolom troškova zakupa poslovnih prostora koje je stranka iskazala u godišnjem finansijskom izvještaju, utvrđeno je da stranka nije u obrascima rashoda pravilno iskazala troškove zakupa poslovnih prostora.

Stranka je u obrascu 4.1 (režijsko-administrativni i ostali troškovi) koji je popunjen na nivou političke stranke, iskazala troškove zakupa poslovnih prostora u ukupnom iznosu od 48.450,00 KM.

Uvidom u ugovore o zakupu poslovnih prostora koje su koristili Centrala stranke i organizacioni odbori stranke u Vogošći, Ilidži, Bihaću, Tuzli, Gradačcu, Jablanici, Visokom, Zavidovićima, Sanskom Mostu, Cazinu i Novom Gradu Sarajevo, utvrđeno je da su troškovi zakupa poslovnog prostora koji je koristila Centrala stranke iznosili 13.000,00 KM, dok su troškovi zakupa poslovnih prostorija koje je stranka koristila u Vogošći iznosili 900,00 KM, Bihaću 4.200,00 KM i Novom Gradu Sarajevo 6.000,00 KM.

Isto tako, utvrđeno je da je stranka u poslovnim knjigama evidentirala troškove zakupa poslovnih prostorija koje je koristila bez naknade u Jablanici u ukupnom iznosu od 2.400,00 KM, Gradačcu u iznosu od 1.950,00 KM, Visokom u iznosu od 1.200,00 KM, Zavidovićima u iznosu od 1.600,00 KM, Sanskom Mostu u iznosu od 3.600,00 KM i Cazinu u iznosu od 1.200,00 KM.

Pored navedenog, utvrđeno je da je stranka u svojim poslovnim knjigama troškove zakupa poslovnih prostorija koje je koristila na Ilidži evidentirala u manjem iznosu za 200,00 KM, dok su troškovi zakupa poslovnih prostorija koje je koristila u Tuzli evidentirala u većem iznosu za 1.800,00 KM u odnosu na stvarne.

- Stranka u poslovnim knjigama nije evidentirala i u godišnjem finansijskom izvještaju nije iskazala troškove provizije po transakcijama putem PayPal računa, a koji su u periodu od januara do decembra 2020. godine iznosili 3.877,14 KM<sup>7</sup>.

- Uvidom u poslovne knjige utvrđeno je da je stranka troškove ostalih zakupa koje su nastali u vrijeme izborne kampanje u iznosu od 130,00 KM evidentirala u obrascu 4.1 godišnjeg finansijskog izvještaja.

Stranka je u obrascu 4.1, takođe, iskazala troškove zakupa sala koji su nastali u periodu od 07.10.2020. godine do 22.11.2020. godine u ukupnom iznosu od 1.575,00 KM.

Platforma za progres je putem posebnog računa za finansiranje izborne kampanje platila i račune za troškove hotelskog smještaja. Uvidom u poslovne knjige utvrđeno je da je stranka troškove hotelskog smještaja evidentirala u periodu od 19.07.2020. godine do 15.10.2020. godine, u ukupnom iznosu od 2.994,50 KM, te da je iste u godišnjem finansijskom izvještaju iskazala u obrascu 4.1 kao režijsko-administrativne i ostale troškove.

Stranka je sve troškove koji su nastali u svrhu izborne kampanje trebala iskazati u obrascu 4.2 kao troškove izborne propagande.

- Kontrolom troškova evidentiranih u poslovnim knjigama na kontu 40320-usluge reklame putem panoa, plakata, letaka i sl., utvrđeno je da je stranka u poslovnim knjigama evidentirala račun dobavljača OR „PRINTMANIA“ Sarajevo, broj: 000130/19 od 25.10.2019. godine u iznosu od 120,00 KM, što ukazuje da ne vodi pravovremene evidencije o svojim rashodima i obavezama.

- Dobavljač „Europlakat BH“ d.o.o. Sarajevo je za zakup 100 površina (billboard i city light) u periodu od 28.10.2020. od 14.11.2020. godine izdao stranci fakturu br. 863-10/20 od 28.10.2020. godine u iznosu od 1.755,00 KM. Uvidom u fakturu utvrđeno je da pojedinačne faturisane cijene zakupa značajno odstupaju od cijena zakupa. Takođe je utvrđeno da je dobavljač stranci odobrio rabat od 97,57 % na cijenu billboard, te 97,28% na cijenu city light, odnosno ukupno 58.028,57 KM.

Na osnovu navedenog, mišljenja smo da je stranka u svojim poslovnim knjigama i finansijskom izvještaju troškove zakupa površina za billboard i city liht iskazala u manjem iznosu u odnosu na stvarne.

- (7) Uvidom u dostavljene račune koji su knjiženi na kontima troškova propagande i reklame, utvrđeni su nedostaci kod računa dobavljača, koji su knjigovodstvene isprave o nastalim poslovnim događajima<sup>8</sup>.

Kontrolom računa za usluge reklame putem panoa, plakata, letaka i sl., utvrđeno je da račun Štamparije „Kompa“ broj: 76/20 od 16.12.2020. godine u iznosu od 100,00 KM ne sadrži podatke o vrsti propagandnog materijala, već je na istom navedeno samo propagandni materijal.

Uvidom u račun dobavljača „A-print“ Zenica broj: 156/20 od 23.10.2020. godine u iznosu od 1.228,50 KM utvrđeno je da isti ne sadrži potpis lica koje je fakturisalo uslugu, niti pečat dobavljača.

<sup>7</sup> 1.474,60 USD; 598,37 EUR; 107,57 SEK; 60,10 NOK; 70,58 CHF; 22,72 AUD i 124,20 DKK.

<sup>8</sup> U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

Isto tako, na računu dobavljača „BNpro“ d.o.o. Sarajevo broj: 20-360-000272 od 10.12.2020. godine u iznosu od 1.000,00 KM, koji nije ne sadrži potpis lica koje je fakturisalo uslugu niti pečat dobavljača, navedeno je prefakturisanje troškova za troškove printanja propagandnog materijala za lokalne izbore općine Centar.

Pored navedenog, utvrđeno je da računi, koje je stranka dostavila u toku obavljanja kontrole finansijskih izvještaja, nisu odobreni za knjiženje, tj. prije knjiženja nisu potpisani od strane odgovornog lica ili lica koje je zaduženo za kontrolu računa.

- (8) Platforma za progres nije u poslovnim knjigama i godišnjem finansijskom izvještaju iskazala tačne podatke o svojim obavezama na dan 31.12.2020. godine, čime je prekršila odredbe člana 24. Pravilnika.

-Uvidom u poslovne knjige utvrđeno je da su ukupne obaveze stranke na dan 31.12.2020. godine iznosile 51.961,02 KM, od čega: obaveze prema dobavljačima 18.768,98 KM, obaveze za autorske i ugovore o djelu 680,00 KM, obaveze za bruto plate 7.512,01 KM i ostali kratkoročni zajmovi 25.000,03 KM.

Stranka je u obrascu 5 (obaveze) iskazala obaveze prema dobavljačima u ukupnom iznosu od 18.768,98 KM i obaveze po osnovu pozajmice fizičkog lica Amer Hadžikadić u iznosu od 15.000,00 KM.

-Platforma za progres je u obrascu 5 iskazala obaveze prema fizičkom licu Sakiba Hotović u iznosu od 4.500,00 KM. Uvidom u Aneks ugovora o zakupu poslovnih prostorija br. 07,3-10/20 od 10.04.2020. godine utvrđeno je da se zakupodavac Sakiba Hotović odriče zakupnine za korištenje poslovnih prostorija od 15.04.2020. godine do 31.12.2020. godine. Uvidom u analitičku karticu obaveze prema Sakibi Hotović utvrđeno je da je stranka u korist prihoda isknjižila samo 4.500,00 KM, te da je suprotno odredbama Aneksa evidentirala obavezu za zakupninu za period septembar-decembar 2020. godine u iznosu od 4.000,00 KM.

Na osnovu navedenog, utvrđeno je da stranka nije imala obaveze prema fizičkom licu Sakiba Hotović u iznosu od 4.500,00 KM, nego samo 500,00 KM.

**e) Platforma za progres prekršila je odredbe člana 12. stav (3) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.**

Platforma za progres je postizborne finansijske izvještaje za Lokalne izbore održane u toku 2020. godine dostavila nakon zakonom propisanog roka, te suprotno odredbama člana 3. stav (2)<sup>9</sup> Pravilnika o predizbornim i postizbornim finansijskim izvještajima političkih stranaka („Službeni glasnik BiH“ br. 10/18).

-Platforma za progres je postizborni finansijski izvještaj za Lokalne izbore 2020. godine (izvještajni period 01.06.-15.12.2020. godine) dostavila Centralnoj izbornoj komisiji Bosne i Hercegovine dana 22.03.2021. godine u čvrstoj kopiji, odštampan iz aplikacije FI CIK BiH, dok u aplikaciji FI CIK BiH ovaj izvještaj nije podnijela na pravilan način. Naime, stranka je popunila sve obrasce finansijskog izvještaja, te ih je zatvorila, ali nije podnijela finansijski izvještaj.

U skladu sa odredbama člana 15.1 stav (1) Izbornog zakona Bosne i Hercegovine, rok za dostavljanje ovog finansijskog izvještaja je bio 15.01.2021. godine.

Takođe, stranka u postizbornom finansijskom izvještaju nije iskazala nenovčanu donaciju pravnog lica „Europlakat BH“ d.o.o. Sarajevo i troškove izborne kampanje, čime je prekršila odredbe člana 12. stav (3) Zakona o finansiranju političkih stranaka, člana 15.1 stav (1) Izbornog zakona Bosne i

<sup>9</sup> Političke stranke finansijske izvještaje podnose Centralnoj izbornoj komisiji BiH u elektronskoj formi putem aplikacije FI CIK BIH. Potvrdu o podnesenom finansijskom izvještaju i odštampane obrasce finansijskog izvještaja u PDF formatu, ovjerene potpisom ovlaštenog lica i pečatom političke stranke, političke stranke dostavljaju Centralnoj izbornoj komisiji BiH i u čvrstoj kopiji.

Hercegovine i odredbe Pravilnika o predizbornim i postizbornim finansijskim izvještajima političkih stranaka („Službeni glasnik BiH” broj: 10/18).

-Platforma za progres je postizborni finansijski izvještaj za Lokalne izbore 2020. godine u Mostaru (izvještajni period 08.08.2020.-19.01.2021. godine) podnijela putem aplikacije FI CIK BiH dana 30.04.2021. godine, ali Centralnoj izbornoj komisiji Bosne i Hercegovine nije dostavile odštampane obrasce finansijskog izvještaja.

U skladu sa odredbama člana 15.1 stav (1) Izbornog zakona Bosne i Hercegovine, rok za dostavljanje ovog finansijskog izvještaja je bio 19.02.2021. godine.

#### **f) Namjenski račun za finansiranje kampanje tokom Lokalnih izbora 2020. godine.**

Kao transakcijski račun koji je, u skladu sa odredbama člana 4.4 stav (1) Izbornog zakona BiH, bila obavezna otvoriti i namjenski koristiti za finansiranje izborne kampanje, stranka je prijavila transakcijski račun stranke broj: 1994990049598929 kod Sparkassebank dd.

Pregledom godišnjeg finansijskog izvještaja utvrđeno je da je stranka troškove oglašavanja putem Facebook i Google u iznosu od 9.013,22 KM platila putem PayPal računa.

#### **Troškovi izborne kampanje**

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>10</sup> po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Platforma za progres je u svrhu izborne kampanje za Lokalne izbore 2020. godine mogla da potroši sredstva u iznosu od 555.848,10 KM, a u svrhu izborne kampanje za Lokalne izbore u Mostaru 2020. godine mogla je da potroši sredstva u iznosu od 30.259,20 KM.

Platforma za progres je u obrascima 4.1 (režijsko-administrativni i ostali troškovi) i 4.2 (troškovi propagande) godišnjeg finansijskog izvještaja za 2020. godinu iskazala troškove propagande u iznosu od 119.269,80 KM<sup>11</sup>.

#### **5.2. PREPORUKE**

*Preporučuje se Platformi za progres da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava,*
- *da, u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju i da sačinjava potvrde u skladu sa članom 6. Pravilnika o godišnjim finansijskim izvještajima političkih stranaka,*
- *da priloge fizičkih i pravnih lica prima u iznosima koji ne prelaze zakonom dozvoljeni limit na visinu priloga,*
- *da se ne finansira iz zabranjenih izvora,*

<sup>10</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

<sup>11</sup> Troškovi izborne kampanje nisu konačni jer je stranka troškove zakupa po računu „Europlakat BH“ d.o.o. iskazala u manjem iznosu u odnosu na stvarnu vrijednost.

- *da poslovne knjige vodi u skladu sa računovodstvenim propisima, odnosno da vodi pravilne, potpune i pravovremene evidencije o svojim prihodima, rashodima i obavezama, kao pretpostavku za pravilno finansijsko izvještavanje,*
- *da uspostavi i vodi evidencije o naplaćenim članarinama i priložima fizičkih i pravnih lica na način da omogući pravilno finansijsko izvještavanje o iznosu donacija/članarina koje je svaki donator/član stranke uplatio u toku godine,*
- *da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanim rokovima i na način utvrđen Pravilnikom o godišnjim finansijskim izvještajima političkih stranaka i Pravilnikom o predizbornim i postizbornim finansijskim izvještajima političkih stranaka i*
- *da postupa u skladu sa podzakonskim aktima koje donosi Centralna izborna komisija Bosne i Hercegovine.*

#### **KOMENTAR:**

U ostavljenom roku, Platforma za progres nije dostavila primjedbe na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2020. godinu.

Šef Odsjeka za revizijske poslove, revizor  
Sanja Tošović

Šef Službe za reviziju  
Mr.sc. Hasida Gušić